

两淮监法志稿

兩淮鹽法志稿卷一百二十六

鄰稅門

湖北江防加價

自軍興後京外各餉以兩淮課釐爲大宗光緒二年侍郎袁保恆議加鹽價每斤二文以引計之淮北每引須加八百文淮南須加一千二百文鹽臣以核入成本勢必銷滯運艱其事遂寢至十年楚督因江防吃緊無論川淮每斤加抽錢二文以充礮臺軍械之用江省勢難力爭而其時適有宜昌加抽川釐之舉二者猶得以相持也志江防加價

光緒十年正月署湖廣總督卞寶第湖北巡撫彭祖賢奏
稱准戶部咨開遵議臣等會奏察看江防形勢應行籌
辦事宜一摺所請截留湖北應解邊防經費作爲江防
經費實難議准其現應如何籌辦江防應飭自爲籌計
不得以款難挪借藉詞諉卸等因臣等查鄂省款項奇
絀現時籌辦江防不能不建礮臺製槍礮核計用款至
少非十餘萬不可查光緒四年湖北辦理晉豫賑捐由
淮鹽商販按每鹽一引加價銀一錢按鹽一斤不過增
錢三毫協助賑需已著成效此次江防需款實較辦賑
爲尤重擬卽援照捐賑成案變通辦理每鹽一斤加價

錢二文在食鹽之家大戶日用鹽一斤半斤不過日多
費錢一文二文次小各戶更屬無多以零集整可期成
數現與鹽道武震淮鹽督銷局道員程桓生詳細商酌
僉稱可行惟川鹽與淮鹽分銷湖南與湖北接壤凡有
湘鄂行銷之鹽無論川淮概須每斤加價錢二文以昭
畫一而免民間取巧等弊所收錢數照案由各商販交
督銷局彙解善後局備用俟江防撤後卽行停止二月
奉

旨戶部知道四月戶部咨稱查兩湖地方每年約銷淮鹽二
十三萬九千餘引每引鹽六百斤以每斤扣價二文計

算可收錢二十八萬六千餘串又川鹽行楚每年約運銷八千四百引花鹽每引一萬斤巴鹽每引八千斤花巴二鹽牽算每斤二文以計之約可收錢十五萬有奇總計川淮兩處運楚之鹽每年約可共收錢四十餘萬串有奇除辦理江防據奏稱需經費銀十餘萬兩外尙有贏餘應令專款存儲報部候撥至此次加價二文究於課運民食有無妨礙應查明專案聲覆仍咨湖廣總督轉飭各該局員妥爲經理勿使稍有流弊

光緒十年三月鹽政左宗棠覆湖廣總督咨貴省籌辦江防每斤加價二文查光緒二年袁部堂奏請各省酌加

鹽價每斤二文經沈前部堂切實覆奏兩淮礙難議增在案近來淮鹽售銷已形疲滯食戶與商人唇齒相依遽增售價與銷路是否相妨應飭局查議旋據湖北督銷局武震等稟楚省江防緊要加諸食戶淮局未便力爭且經奉

旨應卽遵行因於三月初五日起按每引正鹽六百斤每斤加價二文合小引每引收銀五錢八分呈報在案查袁侍郎請統加鹽價經沈前部堂奏覆誠恐官滯私暢礙難加增此次楚岸屢飭認真緝私以冀無礙官引且逼近鄰私邊界提鹽價未議加或不至過於窒礙以前鄂

岸淮鹽價值初定二十四兩尙有陸課錢文嗣經分別裁減爲數甚鉅今以江防加價先期趕買已抵一月銷數加價後一兩月閒銷市不足爲憑擬察看情形數月之後如果售數竟形疲滯再當由憲臺咨明楚省奏請停加抑或每斤祇加一文統容酌核辦理經鹽政左宗棠批每引增收銀五錢八分爲數過重行販趕買未加價之鹽其聞風裹足已可概見仰仍體察情形或請全停或予酌減總視銷市暢滯隨時稟候奏咨不得以有此復文遽爲定案四月湖南督銷局郭從矩等稟湘省一隅上困於粵下困於川小民利其價廉味厚百計偷

販今每斤加價二文照六百斤成引計算每百斤亦需
加銀一錢淮價愈增誠恐私販愈甚雖川淮一時並加
似屬持平之道無如川鹽順流而下成本實輕於淮價
之高低商人自爲操縱非淮鹽官爲定價可比昔年加
重鄰稅原爲疏通淮銷起見川商卽跌價搶銷以利私
販轉售是其明驗至粵鹽陸路毘連百計繞越巡緝稍
爲認真爭鬪之案層見疊出釐金局設卡抽收鹽稅亦
祇能准其偷越之腳費以爲收數卽令一律加價萬難
遵照奏定章程辦理淮鹽則點滴歸真鄰鹽則名實不
副小民趨利若鶩禁令實有所不行此加價後川粵鄰

鹽必愈加充斥之實在情形也淮引四岸惟湘岸最滯
今歲開辦尙係戊寅春綱丁丑秋綱尙未銷竣運商旣
苦場商因之去夏淮南場商稟請運鹽赴借銷川鹽引
地減價敵私經議定由額內商人自行試辦業經奏咨
在案現在螺山減價敵私之鹽每斤四十六文一江之
隔價值懸殊岳州湘陰益陽一帶銷數頓絀未必有益
於鄂先已有損於湘今更於現行淮鹽引地加價民間
食賤自屬恆情緝鄰鹽防範旣苦於計窮緝減價之淮
鹽愚民且援爲口實此加價後減價淮鹽勢必侵佔正
岸之實在情形也經鹽政左宗棠批湘岸加價旣於課

運有礙自未便仿鄂試行致與部文相背應俟三箇月
後察看鄂局銷數再行彙奏嗣經卞寶第咨覆鹽銷疲
滯總以嚴緝私販爲第一要著但得私販斂跡無慮銷
路窒礙曾經咨覆在案誠以淮鹽定有行銷引地原不
應任令鄰私浸灌乃督銷局不安籌緝私良法而徒藉
口於食戶加價二文有礙銷路試問徧地皆私卽不加
此二文淮鹽可得暢銷否耶應仍遵奏案加收

光緒十年三月署湖廣總督卞寶第咨查武昌省城所銷
淮鹽去冬曾由賣戶每斤私加價錢四文行至數月並
無妨礙現擬加收江防經費加價二文卽於所加四文

中劃出二文歸公不准藉詞再加似仍取之食戶與商
本無損現通飭各州縣及留防營弁認真緝私倘敢玩
縱定卽參辦但得私販斂跡自無慮銷路窒礙經鹽政
左宗棠覆咨此案先據督銷局稟已於三月初五日起
每引增收銀五錢八分業經批發以爲數過重應再體
察情形或請全停或予酌減在案是此後必須銷市一
無短絀方可照辦應俟數月後再行定案惟所慮者名
雖出自食戶實則取之水販且鄂中每引以錢合銀僅
收五錢八分自此以後比前若因之短銷一引則淮南
卽短收釐銀六兩有奇是鄂中所得者小而淮南所失

者大至貴督咨開鄂銷淮鹽去冬由各商販按每斤私加錢四文是鄂省商販暗索舊章並未據局詳稟無從查考應飭督銷局查明詳報四月督銷局程桓生稟該販私加鹽價四文係指鋪販轉售食戶而言殆鹽價有貴賤鋪戶零賣錢數致有增減各屬城鄉銷市俱有不
同與局售價銀無涉故未詳稟查考

光緒十年三月湖北督銷局程桓生湖北鹽法道武震等呈江防加價二月奉署湖廣督院札飭局遵辦等因遵照舉行一面出示曉諭定於三月初五日起漢局售鹽於售價外飭水販按斤加價二文淮鹽係按引出售每

引正鹽六百斤應收錢一千二百文鹽價係收銀應合成銀數合小引每引收銀五錢八分隨正價並收不准鋪戶藉詞影射格外加增武穴德安新隄三分局於文到五日一律照辦每月由卑局彙齊解交湖北善後局查收濟用其邊界提運減價敵私之鹽未便照加至前議監汚賑款按引收銀一錢先由卑局墊解銀五千兩約已收一千數百兩其餘尙未收集此次每斤加價二文則前項之每引一錢若再併收未免過於喫重擬於核收江防經費之日卽停止助賑一錢之款總分局將已收之數截清實共收銀若干兩另文報明所有五千

兩預墊未足之數未便久懸擬於新收款內劃出歸還
以清款目第按斤加價後慮私鹽充斥擬卽會同鹽道
衙門籌議章程另行詳請湖廣督憲核奪飭屬實力遵
行庶於鹺銷不致窒礙

光緒十年閏五月湖廣總督卞寶第湖北巡撫彭祖賢奏
法夷違約攻我粵邊防營並調兵船集上海稱欲赴天
津索償兵費又雇長江引水多人希圖入江等說法夷
反覆無常不能無所備禦臣前奏查看江防情形聲明
田家鎮爲全楚門戶須五千人扼守方足以資捍禦原
設鄂防武毅營前經提督李長樂調帶四營赴防天津

未令回鄂現存陸路營勇爲數無多武漢襄樊伏莽未盡緝捕彈壓均須留防竊計臨警之時可以抽調赴敵者總不過二千人兵力過形單薄當與善後局司道籌商暫募湘勇兩營先期訓練以備調遣應給支食薪糧未敢動用正款臣查江防經費業已奏奉

諭旨准於食鹽賣價每斤加錢二文鄂銷川淮等鹽行已兩月有餘民情安之若素核諸課運亦尙如常卽此集零成整似可稍資協濟惟湘岸鹽價商人不願豫繳至今未曾舉行臣當體察輿情亦不勉強但就鄂省現籌經費章程與江防相爲終始自不甚於掣肘奉

旨報可

光緒十年六月湖南督銷局郭從矩等稟准鹽加價一案
前奉批示湘岸多一粵鹽浸灌岳州等處又與減價之
螺山只隔一江與鄂岸情形迥不相同准鹽加價既於
課運有礙自未便仿鄂試行致與部文相背遵照辦理
兩月以來於常德湘潭等處遇有私販固積隨時實力
堵緝惟疊奉南撫憲面諭粵鹽加價二文已奏准通飭
衡永各局欽遵辦理粵鹽既加准鹽事同一律但能認
眞緝私未必卽有窒礙等語查湘岸各分局緝私稍一
認真拒捕之案時所不免不能不倚重地方官隨時整

頓再四籌商擬每斤加價一文每票照正引扣收錢三百串以錢折銀每票約收銀一百八十兩目前銀價甚昂每石又加價百文銷市未必毫無妨礙但令緝私能不掣肘或於常年銷數不致十分懸殊經鹽政曾國荃批查鄂局加價後銷市尙不致過滯湘局旣經楚省大府催辦該道等擬將淮鹽每斤加價一文又據聲明目前銀價甚昂每石又加百文是加收後銷市能否無礙尙無把握姑准試行兩箇月如果銷數有礙仍卽稟請停止八月郭從矩稟奉批現經通飭各分局於現銷之票起每實鹽百斤加牌價長平銀五分每票連餘斤約